

## 每週經課朗誦經文(巴克禮台語漢字)2013/12/22

### 共同經課 - 1 以賽亞書七章十節~十六節

10 耶和華閣吩咐亞哈斯講：11 「你著對耶和華——你的上帝求一個兆頭：通求伊佇深淵，抑是極高的天。」12 亞哈斯講：「我毋求；亦毋試耶和華。」13 以賽亞講：「大衛的家啊，恁著聽！恁互人為難豈算做小可事，亦欲互我的上帝為難嗎？14 因為按呢，主本身欲互恁一個兆頭，看啊，有在室女欲懷孕生子，給伊號名叫以馬內利。15 到伊會曉得放揀歹揀好的時，伊才欲食奶油及蜜。16 因為佇此個囡仔猶未曉得放揀歹揀好的代先，你所驚的彼二個王的地欲抵著放揀。

### 共同經課 - 2 詩篇八十篇一節~七節，十七節~十九節

1 〔亞薩的詩，交互樂官。調用做干證的百合花。〕以色列的牧者啊，導約瑟親像羊群者，求你俯耳孔聽！坐佇基路兵的頂面者，求你發出你的光！2 佇以法蓮、便雅憫、瑪拿西的面前，展出你的權能，來救阮。3 上帝啊，互阮倒轉，互你的面發出光，阮就得著救！4 萬軍的上帝——耶和華啊，你向你的百姓的祈禱發出受氣，欲恁久啊？5 你用目屎做食物互in食，閣量多多目屎互in飲。6 你互隔壁國因為阮來相爭；阮的對敵相及啲笑。7 萬軍的上帝啊，互阮倒轉，互你的面發出光，阮就得著救！17 願你的手按佇你正旁的人，就是你為家己所堅固的人子。18 按呢，阮就無倒退離開你；求你互阮得著活，阮就欲求叫你的名。19 萬軍的上帝——耶和華啊，互阮倒轉，互你的面發出光，阮就得著救！

### 共同經課 - 3 羅馬書一章一節~七節

1 耶穌基督的奴僕保羅，受召做使徒，分別伊來傳上帝的福音，2 就是上帝從前託伊諸個先知佇聖經所應允的，3 論伊的子，照肉體是對大衛的後裔生的；4 照聖德的神就對死人的復活，用權能顯明伊是上帝的子，就是咱的主耶穌基督。5 阮對伊受恩及使徒的職，欲為著伊的名互人佇萬邦中信來順趁；6 從中也有恁諸個受召屬耶穌基督的。7 批寄互見若住佇羅馬、上帝所疼、受召做聖徒的。願恁對咱的父上帝及主耶穌基督得著恩典平安。

### 共同經課 - 4 馬太福音一章十八節~二十五節

18 耶穌基督的出世記佇下底：伊的老母馬利亞，已經做約瑟定著，猶未娶過門，就對聖神有娠孕。19 伊的丈夫約瑟是義的人，毋愛顯然辦伊，按算欲暗靜廢親。20 啲想的時，有主的天使佇伊的眠夢中出現，講：「大衛的後裔約瑟啊，無得驚！著娶你的某馬利亞過門，因為伊所懷孕的是對聖神。21 伊欲生子，你著叫伊的名做耶穌，因為伊欲救伊的百姓脫出in的罪惡。」22 此個事攏成，是欲應驗主託先知所講的，23 講：你看，在室女欲娠孕生子；人欲叫伊的名做以馬內利。（翻譯就是「上帝及咱佇啲」。）24 約瑟睏醒，起來，照主的天使所命令去行，娶伊的某過門；25 無及伊同房，到伊生子，就叫伊的名做耶穌。